



Шочмо эл, порылык да чын верч!

Б У Д Ъ Г О Т О В /

Ямде лий


37-ше (3737) №,
2025 ий 19 сентябрь,
кугарня



0+

1933 ий 1 февраль годсек лектеш.

Ялозанлык пашалан кумылангыт



Биологийым тунуктышо
В.А.Ямбашева урок годым.

Марий Элыште черетан агроклассым Волжский район Пётъял школышто почыныт. Палемден кодыман, 2027 ий марте республикыште 38 школышто тыгай класс лийшаш. Ты сомыл «Технологическое обеспечение продовольственной безопасности» нацпроектын «Кадры в АПК» федерал проектшылан кōра илышыш шындалатеш.

Пётъял школысо агроклассыште 7-11-ше класслаште тунемше-влак уш-акылыштым пойдарат. Агрокласс дене Йошкар-Оласе аграрный колледж, Юл кундем

кугыжаныш технологический университет да «Овощная лагуна» ялозанлык кооператив кылым кучат. Нуно икой дене ончыкылык ялозанлык пашаен-шамычым ямдылат. Йоча-шамыч түрлө предметым келгын тунемыт, ялозанлык кооперативыште практикым эртат. Ёдыр-рвезе-влак кенез мучкат «Овощная лагунышто» пашам ыштеныт. Кооперативым вуйлатыше А.В.Пушкин Шинчымаш кечын ойыртемалтше тунемше-шамычлан Таумутым кучыктен.

У тунемме ий тўналмеке, йоча-влаклан ялозанлык пред-

приятыйыште икымше практик занятийым эртареныт (**пурла снимкыште**). Нунылан Наталья Пушкина киярым теплицыште да петырыдыме кумдыкышто куштымо нерген каласкален, экскурсий лийын. Йоча-влак киярын молан лач ужар тўсан улмыжым пален налыныт.

Агроклассын лектышыже икмыняр ий гыч раш палдырна. Тидлан йоча-шамычат, кугыен-влакат ўшанат.

Нина **ВАСИЛЬЕВА**.
Фото-влакым школ
архив гыч налме.

ПОДПИСКЕ

Россий мучко 2026 ийын икымше пелийжылан газет ден журнал-влаклан подпискым ыштыме тургым тўналын. «Ямде лий» газетлан возалташ вашкыза. Акше – 505 тенгеат 56 ыр (Марий Элыште). Индекс – П4696.

Рекламе.





Весела койыш ОНЧЫКО ЛУКТЫН

Тула кундемесе «Шахтёр» парк-отельште йоча команде-влакын всероссийский КВН фестивалышт мучашлалтын. Тудо латнымыш гана эртаралтын. Тушко Российысе 60 регион да Беларусь Республик гыч 145 усталык коллектив ушнен. Марий Элын чапшым «Мульти-скилл» ден «Дети Марий Эл» команде-шамыч (снимкыште) араленыт. Нуно чолгалыкышт дене ойыртемалтыныт да кокымшо турыш лектыныт. «Дети Марий Эл» команде всероссийский КВН-ын

Юниор-лигыштыже мастарлыкшым тергаш тўналеш, а «Мульти-скилл» – «КВН Дети» телепроектын у сезоныштыжо. Палемдыман: йоча-влаклан кугу сценыш лекташ полышым Марий Эл Республикысе Самырык-влак политике комитет пуэн. «Молодёжь и дети» национальный проектым илышыш шындырмаш удыр-рвезе-шамычлан ты кўкшытыш шуаш йўным ыштен.

Катя СЕРГЕЕВА ямдылен.
Фотом «ВКонтакте» соцкылысе
«КВН Марий Эл» тўшка гыч налме.

• Сенымаш •

Марий Турек школышто тунемше Полина Щеголева – «Твори Добро» всероссийский конкурсын сенышыже. Проектым арален, эн

тале 25 участник коклашке логалын. Тудо «Артек» тўнямбал йоча рўдериште «Твори Добро» сменыште канаш тўналеш.

Калык вургем пайрем



12 сентябрьште Башкортостан Республикыште Калык вургем кече эртаралтын. Тиде пайрем республикыште илыше тўрлў калыкын поян да мотор тўвыраж дене палдарен. Калык вургем тиде тыглай гына чиём огыл. Тиде тукум гыч тукумыш куснышо историй, йўла да поянлык. Ме кугезына-влак дене кугешнена да чумыр поян-

лыкыштым ончыкыжымат аралаш тўнгалына.

Балтач район Йыванай школышто тунемше йоча ден туныктышо-влакат ты акцияшке кумылын ушненна (снимкылаште). Кажне тунемше калык вургем дене школышко толын. Тўрлў калыкын тўвыраж дене палыме лийын.

Надежда БЕЛЯЕВА.
Авторын фотожо-влак.

Российысе увэр

Йоча-влак, искусственный интеллект дене кылым кучеда? Шинчымашдам всероссийский олимпиадыште терген ончыза. Йодмашым 4 октябрь марте колташ лиш. Тўрыс увэр – cups.online платформышто.

Школ театрышке ушнышо удыр-рвезе-влак усталыкыштым «Школьная классика» всероссийский проектын VI сезоныштыжо ончыктен кер-тыт. Кумданрак projects.pervuye.ru сайтыште лудса.

Пўртўсыштў фотоаппарат дене кошташ йўратыше-влак «Мир глазами биолога» фотоконкурсым шотыш налза. Тушко 23 ноябрь марте икмыняр танас почеш ушнаш йўн уло.

Марий Элысе увэр

«Российысе эн сай йоча лагерь – 2025» конкурсым иктешлыме почеш, Марий Элысе «Радужный» йоча туныктымо рўдер каныме да тазалыкым пенгыдемдыме 20 эн чапле тўнеж радамыш пурен.

«Родная игрушка» российысе конкурсышто Йошкар-Ола гыч Кирилл Милютин «Построй свой город. Деревянное государство» проектше сеныше радамыш лектын. Автор да тудын пашаж нерген 8 августышто савыкталтше «Ямде лий» газетыште палдаренна.

11 октябрьште И.С.Палантай лўмеш тўвыра да сымыктыш колледжын Национальный сымыктыш гимназийже пелен «Изи шўдыр» регион-влак кокласе усталык конкурс эртаралтеш. Конкурсышко заочно ушнаш йодмашым 26 сентябрь марте вучат.

Пырляште – вий

Российыште түрлө калык келшен ила. Нунын коклаште пенгыде вашкылым арален кодымо да вияндыме сомыл – самырык-шамычын кидыштышт. Лач ты шонымаш дене 9-12 сентябрьште Йошкар-Олаште финн-угор калык-влакын III всероссийский форумышт эртаралтын. Тушко элан 32 регионжо гыч 200 утла участник ушнен.

Пайремым Э.Сапаев лүмеш Марий кугыжаныш опер да балет академический театрыште почыныт. Чапле концертым ончыктеныт, самырык-влакын проект конкурсыштым иктешленыт. Сengыше-шамыч радамыште марий ўдыр-рвезе-влакынат пашашт лийын.

Форумышто финн-угор калык-влакым тургыжландарыше йодыш-шамычым нўлталыныт. Нуным секцийлаште кумданрак канашеныт. СМИ пашаен-влак (снимкыште) «Кызытсе увер кыл кумдык» секцийыште паша опытышт дене палдареныт. Вес кундемыште могай газет-шамыч савыкталтыт, йочалан пўлеклалтше изданий мо дене чаплана? Йоча газет редакцийыште пашам ышты-



ше еглан ты йодыш-шамычлан вашмутым муаш поснак онгай лийын. Газетым ямдылыме сомыл кызытсе саманын йодмыж почеш виянгеш. Изирак-шамычым шочмо йылме, тўвыра деке шўмандаш тўрлў йўн кучылталтеш. Мутлан, увер-влакым жапыште шараш маньын, интернет дене пайдаланат, видео, йўк контентым ямдылат.

Форумын участникше-шамыч Келшымаш аллеим почыныт. Рўдоласе Калыкле тўвыра пўрт ончылыно 23 пушентым шындыныт.

Погынымаш «Мисс студенчества Финно-угрии – 2025» мотор-

лык конкурс дене мучашлалтын. Сengыше – Удмурт Республик гыч Софья Снигирева.

12-13 сентябрьште Марий кундемыште эше ик кугу мероприятий эртаралтын: Российысе финн-угор калык-влакын ассоциацийыштын VIII съездше. Тушко 41 регион гыч делегат-шамыч ушненыт. Погынышто «Традиционные духовно-нравственные ценности финно-угорских народов в укреплении российской нации» темым радамленыт.

Оля МАЙКОВА.
Авторын фотожо.

Эн мотор, эн поро

Икымше туныктышем – Людмила Викторовна Андреева. Мотор сынже, лыжга йўкшў, поро кумылжо мыланем вигак келшенит. Эн тўнжў: келге шинчымашым пуэн. Кызыт тудо 3-шо классыште тунемше-влак дене пашам ышта. Ме, 7-ше классыште шинчымашым погышо ўдыр-шамыч, Людмила Викторовна дене вашлияш эре вашкена, ой-кангашым йодына. Мо онгайже: икымше туныктышына ден кызытсе класс вуйлатышына Эвелина Анатольевна 1-ше гыч 11-ше класс марте пырля тунемыныт. Коктынат «Ямде лий» газетын чолга юнкоржо лийыныт.

Туныктышына-шамыч дене кугешнена. Нунын куштылго огыл пашаштышт сengымашым тыланена.



Рафаила ДМИТРИЕВА.
Волжский, Сотнур.
Снимкыште: Л.В.Андреева дене пырля.
Фотом школ архив гыч налме.

Черетан вашлиймаш

Сотнур селасе Свято-Троицкий храмын настоятельже иерей Игорь Сапаев, у тунемме ий тўналмеке, школлашке йоча-влак дене вашлиймашке вашка. Шукерте огыл тудо Волжский районысо Сотнур ден Карай школлаште лийын. Изирак да кугурак класслаште тунемше ўдыр-рвезе-влак дене порылык да осал койыш нерген мутланеныт. Икте-весым игылтмаш, кучедалмаш уда койыш-шоктышлан шотлалтымаш рашемдыныт. Настоятель йоча-шамычын йодышыштан вашештен. Вашлиймаш онгай, шонкалаш таратыше лийын.

Людмила НИКОЛАЕВА ямдылен.



Ме шарнена! Ме кугешнена!

2025 ий – Шочмо элым аралышын идалыкше.



Талешкына

Сар. Могай кочо, чоным тур-
гыжландарыше, шинчавұдым
йоктарыше шучко шомак. Кеч-мо-
гай сар шуко еным тулыкеш
кода, мучашдыме ойгым конда.
Кугу Ачамланде сарыште Сенгы-
машлан 80 ий эртен гынат, та-
лешкына-шамычым эре шарнена.
Кугезе кочам Александр Захаро-
вич Загайнов Ронго район (кы-
зыт Советский) Шудысола ялеш
шочын. 1942 ий 10 апрельыште
Шочмо элым аралаш каен.
1944 ий июльышто нелын су-
сырген да кум тылзе наре эм-
лалтын. Вара уэш сөй пасуш-
ко вашкен.

Кредалмаште патырлыкым он-
чыктымжлан Йошкар Шұдыр
орденым, «За боевые заслуги»,
«За взятие Кенигсберга», «За по-
беду над Германией» медаль-ша-
мычым кучыктеныт. Мөнгыжө
1946 ий 1 мартыште веле пөр-
тылын. Вуйлатыме сомылым
шуктен, ветеринар врач лийын.
1977 ийыште тале йұр годым ту-
дым паша верыштыжак волгенче
перен. Мый кочам дене кугешнем
да таум ойлем.


*Юлия ЯГОДАРОВА.
Советский, Кельмаксола.*

Шучко жап

Кугу Ачамланде сар кажне
гаяк ешышке ойгым да шин-
чавұдым конден. Тиде шуч-
ко жап годым 27 миллион ег
ұмыр лугыч лийын. Мыйын ку-
гезе кочамат Кугу Ачамланде
сарыште кредалын да Берлин
марте шуын. Но тушто фашис-
тын пуляже тудын ұмыржым
кұрлын. Кугезе кочам дене мый
моткоч кугешнем. Сарын нелы-
лыкшым чытен, Сенгымашым
лишемден. Кочамым эре шар-
наш да таушташ тұналам.

*Катя МИТЯКОВА.
Морко, Коркатова.*

Шергакан парт



Специальный сарзе операци-
йыште ятыр рвезе воинский по-
рышым шукта. Мемнан кундем
гыч мобилизаций почеш тушко
логалше икымше патыр – Сер-
гей Валерьевич Бурков. Тудо
1994 ий 13 февральыште шочын.
Конганур школышто тунемын.
2012-2013 ийлаште армийыште
служитлен. 2022 ий 26 сен-

тябрьыште специальный сар-
зе операций радамыш ушнен.
Шкенжым лұддымын кучен. Ик
боевой заданийыште чот сусыр-
ген да ұмыр лугыч лийын. Ко-
лымыж деч вара Мужество ор-
ден дене палемдалтын.

Кодшо ийын школыштына ге-
ройын, Сергей Бурковын, парт-
шым почыныт. Туддене ик ял
гыч улына. Мый Сергейым ве-
села, поро кумылан рвезе се-
мын шарнем.

Школ илышыште шкем чол-
ган ончыктымемлан, тұрлө
пайремыште вұдышө лиймем-
лан, районысо да республики-
се мероприятийлаш ушнымем-
лан мыланем ты парт коклаште
шинчаш ұшаненыт (снимкыште).
Але марте ик тунемшыланат
тыгай пиал шыргыжалын огыл.
Чонышто ылыжше кугешнымаш
кугу ответственностьым «шо-
чыктен». Умбажыжат уста, чол-
га лийман. Талешкын лұмжым
чапландарыман.

*Анна СОКОЛОВА.
Кужэнер, Конганур.
Оля Майкован фотожо.*

Порышым шуктен

Кажне ешыште Ачамландым
аралыше герой-влак улыт, шо-
нем. Авамын тукумжо гыч Ана-
ний Матвеевич Алексеев нерген
палдарыме шуэш. Тудо Агрыз
районысо Кұанэнер ялеш 1948
ий 4 ноябрьыште шочын. Буймо
школым тунем пытарымек, Мен-
зелинскысе медицине училищыш
пурен. Шинчымашым налмек,
Узаевский медпунктышто пашам
ышташ тұналын. Шым тылзе гыч
тудлан повестке толын, да Злато-
уст олаште срочный службым эр-
тен. Варажым 1971-1973 ийлаште
Варзин ФАП-ым вуйлатен, пра-
порщик званийым налын. 1985-
1987 ийлаште Афганистаныш
служитлаш колтеныт. Службы-

жо Джелалабад олаште эртен,
66-шо мотострелковой бригадын
аптекежым вуйлатен. Афганис-
тан деч вара Озангысе кұшыл
артиллерий училищыште, Чис-
тяков лұмеш инженер учили-
щыште служитлен. 1994 ийыш-
те сулен налме канышыш лек-
тын да 2011 ий марте вашкепо-
лыш станцийыште фельдшер-
лан пашам ыштен. Ятыр медаль,
Таумут, Чап грамот-влак дене
суапландаралтын. 2017 ийыш-
те ұмыр лугыч лийын. Тудо
Шочмо эл ончылно порышым
тұрысnek шуктен. Мый тудын
дене кугешнем!

*Наташа ИШМАНОВА.
Татарстан, Агрыз, Буймо.*



Йыл изи – пайдаже шуко

– Мландым кўнчымо годым йылым кольмо дене йоньлыш пўчат гын, кугырак-влак тыге ойлат: «Ит ойгыро, тудым кеч-мынар ужашлан руалат гынат, илыше кодеш». Тиде шонымаш чын огыл вет?

– Йылым пелыгыч руалаш гын, вуй могыржо веле илыше кодеш. А поч могыр ужаш кола, молан манаш гын тушто ны вуйдорык, ны кочкышым шулыктарыше системе уке.

– Йыл-влак молан лач йўран годым мландымбаке лектыт?

– Нуно коваштышт дене шўлат. Йўр йўрмō годым вўд мланде йымаке пура да тушто кислород шагалемеш, садлан лектыт. Эше йўр чыпчыме йўк нунылан удырын коштым ушештара. Туддеч утлаш шонен, йыл-влак яндар южыш вашкат. Эше нунылан ночно мландыште нушкаш утларак йōнан. Тыгай амалат уло.

*Христина АЛЕКСАНДРОВА мутланен.
Фотом рўдерын архивше гыч налме.*

•Палаш онай•

✓ Йыл-влакын кужытышт 2 сантиметр гыч 3 метр марте лийын кертеш. «Гулливвер-шамыч» Австралийыште илат. Нуно 8 метр келгытан роным кўнчат.

✓ Йыл кечым ок йōрате, шокшышто писын кола.

✓ Южышт 16 ий марте илен кертят.

✓ Австралийыште йыллан пōлеклалтше тоштер уло. Тудын формажат йылым ушештара.



Юж яндар

Адак шыже тольо. Тений чодыра понгылан поян. Урок деч вара ме чодырашке вашкена. Тушто моткоч сай. Юж яндар, шўлаш куштылго. Пушенгыласе лышташла нарынчымыныт. Но але ужаргыжат коеш. Кайык-влакын йўкланымыштым шагалрак колат. Нунын вес сомыл: кужу-у-у корныш тарваныман. Мыланна шыже пагыт келша.

*Александр ИВАНОВ,
Кира СМЕРНОВА.
Морко, Коркатова.*



*Алёша ТИМОФЕЕВЫН сўретше.
Волжский, Сотнур.*

Марий паркыште – меран!

Август мучаште Йошкар-Олан моторлыкшым ончаш миенна. Марий паркысе сōраллыкым эскерыде ышна чыте. Коштмо годым мераным шекланышна. «Меран, меран, мерангыс!» – кугу йўкынак ойлышна. Авам «Ида кычкыре, лўдыктеда», – мане. Сур янлык писын кудал эрта, шонышна. Кўчык поч пушенге воктек пызнен шинче. Ятыр жап нигуш ыш

кай, а ме йолташ-влаклан ончыкташ видеош войзышна. Вара, корем дене умбакыла кудалын, мемнан велыш кусныш. Шекланен-шекланен, шолашкыла чымалте. Мераным лўдшō, манят. Тыгайла ыш кой. Кужу пылышан янлыкым икымше гана ужынам. Куанже мынар!

*Алина СУББОТИНА.
2-шо номеран Морко школ.*

Шыже

Моткоч сōрале шыжым:
Йырваш шōртнялге тўс.
Мый тудым кызыт шижым:
Мемнан поян пўртўс.
Садерыште пеш тымык,
Лышташ велеш шыман.
А кайык-влакын йўкышт
Шагал йонга кумдан.

*Надежда ГОДУНОВА.
Йошкар-Ола.*



Марла-рушла мутер

Суртвольык ден кайык-влак кузе «кутырат»?

Пий опта.
Собака лает.



Чыве кыдетла.
Курица кудахчет.



Агытан мур.
Петух кукарекает.



Лудо лартла.
Утка крякает.




Чывиге чиокла.
Цыплёнок пищит.



Комбо когокла.
Гусь гогочет.




Сёсна крökла.
Свинка хрюкает.




Пырыс мырла.
Кошка мурлычет.



Имне шинчалеш.
Лошадь ржёт.



Ушкал ломыжеш.
Корова мычит.



Лаштыкым Оля МАЙКОВА ямдылен.
Авторын суретше-влак.

Тамле кочкыш



Визымше классыш вончымеке, труд урокна утларак онгай ли-йын. Шукерте огыл сэндвичым

түшкан ямдыленна. Эн ончык салмам ырыктенна, тушко уш-кал ұйым пыштенна да левык-тенна. Кинде шултышым кок могырымат жаритленна. Изиш йүкшымеке, майонез ден кет-чупым варен йыгенна. Вара помидорым, киярым, ужар са-латым, колбасам пыштенна. Тидым вес кинде шултыш дене петыренна. Моткоч тамле! Мөнгө толмеке, тамле кочкышым ямдылаш кумылангым. Авам деч полишым йодде, ик кұмыж сэндвичым шке ямдылен кер-тым (снимкыште). Ача-авамлан, акамлан пеш келшен. Тидлан моткоч йывыртенам.

Ксения СТОЛЯРОВА.
2-шо номеран Морко школ.
Фотом еш архив гыч налме.

21 сентябрьыште «Тыныслык көгөрчен» тўнямбал акций эртаралтеш.

Ош кайык

Ош кайыкым колтем кавашке, Тек чонешта моткоч торашке. Тек тыныслан куанен ила, Келшымашым, порылыкым акла.

Ушештарыже мотор көгөрчен Кўшычын, мландымбаке ончен, Могай сылне тўняште илаш. Кўлеш каже татым аклаш.

Чапле акцияш мыят ушнем, Мотор кайыкым сўретлем. Айда пырляшке тыят, йолташ, Элнан эртыме корныжым



кўлеш шарнаш!
ПАМПАЛЧЕ.

QR-кодым кучыл-тын, почеламутым колыштса.



Синквейн

Сентябрь
Йўран, мардежан.
Озаланна, кылмыкта, моктана.
21 сентябрь –
шыжым вашлийме кече.
Идым тылзе.
7-ше классыште тунемше-влак.
Волжский, Сотнур.



21 сен-
тябрьыште Росси-
йыште Воин чап
кече палемдалтеш.

1380 ий ты кечын Дмитрий Донской князын вуйлатыме руш полк Куликово кредал-маште татар-монгол войскам кырен шалатен.

1799 ий 24 сентябрьыште руш полководец Александр Васильевич Суворовын вуйлатыме руш войска-влак Швейцарийыште Сен-Готард перевалым герой-лын эртенит.

20 сентябрь –
пакчасаска гыч поделкым
ыштыме кече.

Мастар кид

Маска еш

Шыжым, пакчасаскам поген налме годым, онгай сўретым ужаш лиеш: шўм гай койшо ушменым, парентгым, «йолан-кидан» кешы-рым... Ойыртемалтшыжым подел-кылан кодаш тыршыман. Теве тўр-лө кугытан парентге гыч «Маска ешым» ямдылаш лиеш. Пласти-лин гыч шинчам, пылышым, ум-шам ненчыман. Кавуныш омса ден окнам келыштарыман. Сōраста-рышлан чевер лышташым, пызлы-гичкым кучылташ лиеш.



0+

Марий Эл
Республикысе
«Марий Эл»
увер агентстве» КАУ.
Директор –
Е.И.КУЗНЕЦОВ.
Тўн редактор –
А.Н.ГРИГОРЬЕВА.

Индекс П4696.
Тираж 1550 экз.
Заказ
Формат – А-4-8.

Учредитель-влак:
Марий Эл Республикысе Тўвыра,
печать да калык-влакын пашашт
шотышто министерстве,
Марий Эл Республикысе
«Марий Эл» увер агентстве» КАУ.

Редакций да издатель: Марий Эл
Республикысе «Марий Эл»
увер агентстве» КАУ,
424006, Йошкар-Ола,
СССР Вооружённый Вийын 70-ше
идалькше урем, 20-шо порт.
Тел. 8(8362) 45-22-82.

Газетым редакцийыште
погымо да верстатлыме,
«Марий Эл Республикысе
Правительствын
типографийже» ООО-што
ямде оригинал-макет гыч
савыктыме.
Типографийын адресше:
424000, Йошкар-Ола,
Комсомольский урем, 112.

Печатьыш пуймо жап –
14-00, фактически – 13-00.

Авторын да редакцийын
шонымашышт тўрлө лийын кертят.
Серыш-влак мōнгеш огыт колталт.
Ак – кутырен келшыме почеш.

https://vk.com/yamde_lii
<https://t.me/yamdelii>
yamde_lii@mail.ru
yamdelii@mediamari.ru
(автор-влаклан)
Сайтын адресше: ямделий.рф

Газетым Кыл, информационный
технологий да массовый
коммуникаций сферым
эскерыме шотышто
федеральный службын Юл кун-
дем федеральный округысо
управленийыштыже
регистраватыме.
Номер – ПИ № ТУ52-01404,
2023 ий 22 сентябрьыште пуймо.

У конкурс



– Ой, кунам гын вашке кугу лиям? –
нелын шўлалта Максим.
– Молан? – аваже өреш.
– Вара мыят йочасадыш машина дене
кудагышташ тўналам.

Изи Мишукым аваже вурса:
– Тый могай мут колышдымо, ўскырт улат! Теве
тыйым школышко тунемаш огыт нал!
– Ой, могай сай! Тугеже эре йочасадышке кош-
таш тўналам, – вавешта Мишук.


Акаж ден шўжарже рушла мутланат.

– Акай, карандашет взям?
– Взи взи, – акаже пелешта.

Надежда ГОДУНОВА ямдылен.
Йошкар-Ола.



Шотлыза.

Емыжым
келшыме
ўмыл дене
ушыза.

Пийлан кочкым марте миен шуаш полшыза.

